

四庫全書薈要

• 乾隆御覽本

集部

石湖詩集卷二十四

宋 范成大 撰

題請息齋六言十首

洞門晝挂鐵鎖閣道秋生綠苔著下略同龜伏瓜中且
免蠅來

多謝紛紛雲雨相忘渺渺江湖坐隅但忌占鵬屋上何
煩譽烏

灑灑年年似馬太行日日摧車笑中恐有義甫泣裏難
防叔魚

見影蛾猶鈇鈇聞聲厖尚狺狺問誰毛生名紙知我角
出車輪

不惜人扶難拜非關我醉欲眠勞君敬枯木耳恐汝見
濕灰馬

稅駕今吾將老結廬此地不喧恐妨蝴蝶同夢笑倩顏
當守門

口邊一任醜去鼻孔慵將涕收聞門冷落車轍空室團
樂話頭

冷煖舊雨今雨是非一波萬波壁下禪枯達磨室中病
著維摩

親戚自有情話來往都無雜言酒熟徑須相報文成聊
與細論

園丁以時白事山客終日相陪竹比平安報到花依次
第折來

送劉唐卿戶曹擢第西歸六首

摩挲漢柱愴分襟
邂逅吳船喜盍簪
別久十年知幾夢
情親萬里只初心

學道何關紫與青
發身聊假佛名經
歸來解盡程書縛
千古文章似建瓴

槐黃燈火困豪英
此去書窻得此生
學力根深方蒂固
功名水到自渠成

中年親友惜分離
況我身兼老病衰
餘景庶幾猶及見

登瀛召客過門時

我識岷峨最上頭當年脚力與雲浮
兩山父老如相問一席三椽正卧遊

四海西州舊故多煩君問訊各如何
心期本自無南北

萬里天波一月波

末句戲用蜀語以見久要不忘之意

富順楊商卿使君歸與余相別于瀘之合江渺然
無再會之期後九年迺訪余吳門則喜可知也今
又復分袂更增惘然病中強書數語送之

合江縣下初語離共說再會知何時壽櫟堂前哄一笑
人生聚散真難料青燈話舊語未終船頭疊鼓帆爭風
草草相逢復相送直恐送迎皆夢中昨聞親上安邊奏
玉陛從容移禁漏天香懷袖左魚符歸作雙親千歲壽
我今老病塘蒲衰君歸報政還復來萬里儻容明月共
更期後夢如今夢

久病或勸勉強遊適吟四絕荅之

風月箇中老子江湖之上散人化鑪苦靳清福環堵閒

拋好春

鶴怨久迴俗駕鷗盟誰主載書一丘一壑謝汝三歲三
秋望予

捫蝨即是忙事驅蠅豈非禰心香煖香寒功課窓明窓
暗光陰

羸如孱婦多忌倦似田翁作勞玩具僧梳剔屢歡悰丁
尾龜毛

初秋閒記園池草木五首

莨菪爛紫終陋蒼
葛媽黃亦香醫俗
賸延竹色療愁催
拆萱房

牛牽碧蔓自繞雞
聳朱冠欲爭菱葩
可範伯雅蓼節偏

宜麩生

菱葩為酒杯樣最
佳蒙入麩為勝

旱地蓮花嬌小水
盆梔子幽芳薇帳
半年春艷桂叢四

季秋香

紫薇一名半年紅
嵩桂一種四季有花

醉憐金瓊側卧看
玉簪對橫腥水留
灌末利結香旋

薰素馨

末利用治魚腥
水澆方多花

玉函化生稚子碧枝視現聲聞馬齒任藏永冷鷄頭自

勝硫温

謂孩兒蓮羅漢木馬齒莧中有水銀鷄頭芡實也芡性煖號水硫黃

巖桂三首

風簾疎爽月徘徊悵望家人把酒杯病著幽窻知幾日
瓶花兩見木犀開

越城芳徑手親栽紅淺黃深次第開不用小山招隱賦
身如強健日千迴

一株蕭索倚宣華東苑香風屬內家丹碧屠蘇銀燭照

平生竒絕象山花

少城園中惟有一株建康東御園有亦不多四明丹桂特竒州宅所種尤

蔚茂常與魏丞相夜飲其下

中秋無月三首

兒女無惊坐客稀今年孤負隔年期誰從天上宇遮月
不管人間大欠詩

撲地癡雲欲萬重家家簾幙護房櫳世間第一無情物
誰似中秋雨與風

一生露下風前客兩歲愁邊病裏身姑置陰晴圓缺事

藥寮燈火正相親

藻姪比課五言詩已有意趣老懷甚喜因吟病中
一十二首示之可率昆季賡和勝終日飽閒也

舊歲連新歲涼牀又煖牀山川屏裏畫時刻篆中香畏
壘安吾土支離飽太倉若教身更健鶴背入維揚
認鹿紛紜夢亡羊散亂心眇昏遮眼讀愁苦撫髭吟幸
覺行迷遠其如卧病深通身都放下何用覓砭鍼

日煖衣猶襲宵長被有稜朝晡三楪飯昏曉一釭燈伴

坐跏如几扶行瘦比藤生緣堪入畫寂寞憇松僧

繩椅扶朽骨蒲團閣瘁膚事疑償業債形類窘囚拘空
劫真常體浮生幻化軀箇中元不二無語對文殊

軟熟羞盤饌芳辛實枕幃候晴先晒席占濕豫烘衣易
粟雞皮皺難培鶴骨肥頭顱雖若此虛白自生輝

數息憎晨清伸眉愜晚晴隙塵浮日影窻穴嘯風聲捫
蝨天機動驅蚊我相生偶然成一笑栩栩暫身輕

貴仕龜鑽筴間居馬脫鞅冠塵昏舊製帶眼剩新圍堆

案書郵少登門刺字稀掩關灰木坐休示季咸機
目青浮珠珮聲塵籟玉簫秋懷潘鬢禿午夢楚魂銷注
水瓶花醒吹新藥鼎潮南柯何處是斜日上廊腰

靜裏秋先到閒中晝自長門闌疑泄柳尸祝漫庚桑腹
已朽經笥身猶試藥方強名今日愈勃宰負東牆

汗漬筇枝赤苔封屐齒青有醫延上坐無容抗分庭霽
月鑽窓看鳴琴側枕聽莫嗔猿鶴怨岫幌兩年局

視絮勞羣從祇承愧闔家乳泉供水遞金液養丹芽嘉

釀厚如酪旋春香勝花百端扶老憊無物報投瓜
學業荒呻畢歎悰隔笑鹽入秋先複幕過夏亦疎簾門
客嗔愁思家人獻吉占尤憐小兒女時報鵲鳴簷

贈臨江簡壽玉二首簡攜王仲顯使君書來謁并
見示孔毅甫夢蟾圖今廟堂五府皆有題字

蕭灘遠客扣田廬貽我讀書樓上書千里故情元共月
錯云多病故人疎

卷中圖畫袖中珍上有三階五朵雲白日青天光範路

未饒蟾窟夢紛紜

壽樑前假山成移丹桂於馬城自嘲

堂前趣就小嶙峋未許蹒跚杖屨親更遣移花三百里
世間真有大癡人

灼艾

血忌詳涓日尻神謹避方艾求真伏道穴按古明堂謝
去羣巫祝勝如藥湯起來成獨笑一病攪千忙

東宮壽詩

甲觀秋彌月前星蚤麗天君親重慶日家國中興年英
武神機遠溫文德宇全摘章森典則會道極高堅儉寶
躬安履仁端性自然淵冲澄有量海潤決無邊五學臨
函丈三朝拱邃延頌聲敷政久喜色問安還銅律諧初
度桑弧綿舊傳菊催重九近梅占小春先戲彩倚蘭殿
宣杯玳瑁筵青宮千億壽長對兩宮前

十月朝開爐偶書余病歸二年未能拜埽松楸曩
時常以此日侍先兄遊洞庭并寫悲感之懷

圓芋今年紫籬楓昨日丹開爐修故事聽雨說新寒橘
社重遊阻楸行再拜難此時西望眼衰涕不勝彈

有懷龔養正

好在楚龔子秋來情話稀昨承書素說行侍板輿歸煙
水潮平棹風霜歲晚衣幾時真訪戴莫待雪花霏

白髭行

四十踰四髭始黃手持漢節臨大荒與疾歸來皮骨在
兩鬢尚作青絲光悅仰行年四十九萬里南馳復西走

斑斑頷下點吳霜猶可艾夷誑賓友屈指如今又十年
兩年憊卧秋風前人生血氣能幾許不待覽鏡知皤然
長安後輩輕前輩百方染藥千金賣煩捫包裹夜不眠
無奈霞頭出光怪病翁高卧門長扃垂雪參參骨更清
兒童不作居士喚喚作堂中老壽星

但能之提刑相別十年自曲江遠寄二詩叙舊良
厚因次韻為謝亦以首章奉懷略道湘南分攜時
故事末篇自述年來衰病不復故吾也

憶昔驂鸞識俊英，朱旛繡斧盡能名。
書隨庾嶺一枝寄，句挾韶江九奏成。
吳粵交馳清夜夢，參辰不隔故人情。
何時重醉金槽曲，一洗陽關別恨平。

漫落朽虛似瓠壺，新添雪鬢與雙鬚。
也知病叟形容變，非是仙儒骨相癯。
歲晚山林如自獻，年豐田野亦多娛。
無端拙恙妨清樂，未許扁舟到五湖。

復以蟾硯歸龔養正

夢裏何人歌式微，覺來石友在書幃。
鄭環信美非吾寶，

趙璧猶全任汝歸
渴水雙蟾窺海閣
出雲孤月照星稀
好將自草三千牘
莫與蚍蜉作釣磯

大雪書懷

天將竒賞發清歡
疇昔登臨插羽翰
梅下尋詩騎馬滑
松梢索酒倚樓寒
閉門老子愁無賴
返棹歸來興已闌
聊掬玉塵添石鼎
自煎魚眼破龍團

雪中苦寒戲嘲二絕

冥凌分職大間闕
辛苦行冬強作難
費盡無邊風與雪

劣能供得一番寒

茸氈帳下玉杯寬
香裏吹笙醉裏看
風雪過門無入處
却投窮巷覓袁安

雪復大作六言四首

竒寒擁被曉枕噩夢披蓑晚
江遙想漫天匝地近聽穿
幔鳴窻

釀成送臘三白功在迎年
九秋樵指擔肩相賀飯囊酒
甕何憂

初報折筮搶地旋聞壓柳堆橋寧教風過掀舞可惜雨
來半銷

伶俜凍雀蹲晚噤滲踈梅鎖春有客典衣沽酒何人增
價賣薪

立春
乙巳

綵勝金幡夢裏茶槽藥杵聲中索莫兩年春事小窻卧
聽東風

題徐熙風牡丹二首

紫花

藥珠仙馭曉驂鸞道服朝元露未乾
天半剛風如激箭
綠綃飄蕩紫綃寒

白花

寒入仙裙粟玉肌舞餘全不耐風吹
從教旅拒春無力
細看腰支嫋嫋時

題黃居寀雀竹圖二首

居寀荃之子

羣雀歲寒保聚兩鷄日晏忘歸草間豈無餘粒刮地風

號雪飛

蔓花露下凝碧叢竹秋來老蒼噪雀羣爭何事么禽自

轉清篁

題張晞顏兩花圖二首

晞顏廣漢人
趙昌之甥

繁杏

紅粉團枝一萬重當年獨自費東風若為報荅春無賴
付與笙歌鼎沸中

玉梨

雪薄冰輕不耐春雨中愁緒月中真莫教夢作雲飛去
留伴昭陽第一人

題范道士二牛圖

道士處州人號范牛中年狂顛人傳其得道此圖自稱中興道

士范子珉蓋未顛時所作尤為精妙

西疇滌場淨無塵原頭遠牧秋草春一牛疾行離其羣
一牛返顧如怒嗔目光炯炯矜而馴點綴毫末俱逼真
不顛不狂筆有神妙哉吾宗散仙人

石湖詩集卷二十四

謹案卷二十四第五頁前一行雞頭自勝疏溫刊
本鷄訛鴻據本注雞頭艾實也句改

第六頁前六行認鹿紛紜夢刊本認訛叔據宋詩
改





總校官庶吉士臣侍朝

校對官庶吉士臣章宗瀛

謄錄監生臣江潮

欽定四庫全書薈要

集部

石湖詩集卷二十七

五至

詳校官助教臣謝登萬



石湖詩集卷二十五

宋 范成大 撰

小峨眉 并序

近得靈壁古石絕似大峨眉正峰名之曰小峨眉東坡常以名廬山恐不若此石之逼真也作小峨眉歌以夸之

三峨參橫大峨眉高奔崖側勢倚半霄龍跼虎卧起且伏

旁晚沫水沱江朝禹從岷嶓過其下真山著籍稱雄豪
告成歸來兩階舞泗濱錫貢備九韶覽觀此石三歎息
髣髴蜀鎮俱峇堯惜哉擊拊墮箕虞輦送淮海還山椒
降商訖周謹呵護磬氏無敢加鐫彫劉項蝸爭鬪靈璧
血漂川谷流腥臊水官恐此被染浣纒包席裏吳中逃
市門大隱閱千祀苔衣塵網薶孤標尤物顯晦定有數
昨者惠顧不待招我昔西遊踏禹迹暑宿光相披重貂
十年境落卧遊夢摩挲壁畫雙鬢凋天憐愛山欲成癖

特設竒供慰寂寥恍然坐我寶巖上疑有太古雪未消
嵌根襞積巧入妙峰頂箕踞貴不驕爐烟雲浮布銀界
隙日虹貫凝金橋是時歲杪卧衰疾健起放杖驚兒曹
龍鍾繞圍喜折屐龜手拂拭寒侵袍太湖未暇商甲乙
羅浮天竺均鴻毛小峨之名神所昇永與野老歸漁樵
作詩賀我得石友且以併賀茲丘遭

煙江疊嶂

煙江疊嶂太湖石也鱗次重複巧出天然王晉卿嘗

畫煙江疊嶂圖東坡作詩今借以為名此石里人方氏所藏故物非近年以人工雕斲者比尤可貴

太湖嵌根巖洞宮槎牙石生奔淪中波濤投隙漱且嚙
歲久缺罅深重重水空發聲夜鞞鞞中有晴江煙嶂疊
誰歟斷取來何時山客自言巖奕葉江上愁心惟畫圖
蘇仙作詩畫不如當年此石若並世雪浪仇池何足書
我無俊語對巨麗欲定等差誰與議直須具眼老香山
來為平章作新記

天柱峰 并序

天柱峰英石也一峰峭豎特起有昂霄之意天柱本在衡山自黃帝時即以瀟山輔南岳漢氏因之遂寓其祭於瀟天柱山衡瀟蓋皆有天柱而瀟名特彰九華鴈蕩若他山亦皆以此名峰不足算也

衡山紫蓋連延處一峰巉絕擎玉宇漢家憚遠不能到寓祭瀟山作天柱我今卧遊長揜關却寓此石充瀟山形摹三尺氣萬仞世間培塿何由攀南州山骨孕清淑

乳孽砂牀未超俗神奇都賦小崢嶸雷雨飛來伴幽獨
哦詩月明清夜闌坐看高影橫屋山摩霄拂雲政如此
吾言實夸誰敢刪

甲辰除夜吟

一年三百六日日日日三椽卧衰疾旁人揶揄還歎咨
問我如何度四時我言平生老行李蓐食趨程中夜起
當時想像開門閒弱水迢迢三萬里如今因病得踈慵
脚底關山如夢中重簾複幕白晝靜戶外車馬從西東

若問四時何以度念定更無新與故瓶花開落紀春冬
窻紙昏明認朝暮行年六十是明朝不暇自憐聊自嘲
婪尾三杯餽一椽從今身健齒牙牢

次韻龔養正送水仙花

色界香塵付八還正觀不起沉邪觀花前猶有詩情在
還作凌波步月看

元日

屋角崢嶸斗柄移案頭蕭索燭花垂與時消息評新藥

若節春秋憶舊詩飢飯困眠全體懶風餐露宿半生癡
尊前現在休嫌老最後屠蘇把一卮

正月六日風雪大作

滕六無端異二癡翻天作惡破春遲邀梅勒柳何功業
誰與停杯一問之

奇寒何事入芳辰不管燈枝欲試新即日反風吹盡雪
東君已費一分春

元夕四首

粉痕紅點萬花攢玉氣珠光寶月團簾箔通明香似霧

東君無處著春寒

謂吳中剪羅琉璃二燈

不夜城中陸地蓮小梅初破月初圓新年第一佳時節
誰肯如翁閉戶眠

藥爐湯鼎煮孤燈禪板蒲團老病僧兒女強修元夕供
玉蛾先避雪鬢髻

落梅穠李趁時新枯木崖邊一任春尚愛鄉音醒病耳

隔牆時有賣餚人

謂唱賣烏賊糖者

去年多雪苦寒梅花遂晚元夕猶未盛開

隔年寒力凍芳塵勒住東風寂莫濱只管苦吟三尺雪
那知遲把一枝春燈烘畫閣香猶冷湯煖銅瓶玉尚皴
花定有情堪索笑自憐無術喚真真

寄題筠州錢有文明府新昌小道院

忠厚平生心學敏明隨處民功江左幕中荒政江西縣
裏仁風

勿云私淑小邑可以匹休大邦健筆誰能後賦向來江

夏無雙

題徐熙杏花

老枝當歲寒芳
鶻春澹泞霧綃輕
欲無嬌紅恐飛去

題趙昌木瓜花

秋風魏瓠實
春雨燕脂花
綵筆不可寫
滴露勻朝霞

題易元吉獐猿兩圖二首

擇食庸相喚
無人意不驚
猿啼風動葉
機熟兩忘情
烏逐山公噪
驚鷹仰望疑
春林無一事
猶我自生悲

題張希賢紙本花四首

牡丹

洛花肉紅姿蜀筆丹砂染生綃多俗格紙本有真艷
常春

染根得靈藥無時不春風倚闌與挂壁相伴歲寒中
紅梅

酒力欺朝寒潮紅上粧面桃李漫同時輸了春風半

雞冠

號名極形似摹寫與真逼聊以畫滑稽慰我秋園寂

喜沈叔晦至

澹若論文味嚶其求友聲江湖幾魚沫風雨一雞鳴舊
事休重說新詩莫細評煩將憶勤夢歸對海山橫

驚蟄家人子輩為易疎簾

二分春色到窮閭兒女祈翁出滯淹幽蛰夜驚雷奮地
小窻朝爽日篩簾惠風全解墨池凍清晝騰縉雲笈籤
親友莫嗔情話少向來屏息似龜蟾

韓尚書新造
雲笈七籤

信筆

天地同浮水上萍
羲娥迭耀案頭螢
山中名器兩芒屨
花下友朋雙玉瓶
童子昔曾誇了了
主翁今但諾惺惺
歸田贏得多無事
輸與諸公汗簡青

請息齋書事三首

覆雨翻雲轉手成
紛紛輕薄可憐生
天無寒暑無時令
人不炎涼不世情
栩栩算來俱蝶夢
啾啾能有幾雞鳴
冰山側畔紅塵漲
不隔瑤臺月露清

刻木牽絲罷戲場，祭餘雨後兩相忘。
門雖有雀尚廷尉，食已無魚休孟嘗。
蟲裏趨時真是賊，虎中宣力任為俜。
籬東舍北誰情話，雞語鷗盟意却長。

聚蚋醯邊鬧似雷，乞兒爭背向寒灰。
長平失勢見何晚，栗里息交歸去來。
休問江湖魚有沫，但蘄雲水鶴無媒。
巖扉岫幌牢扃鑰，不是漁樵不與開。

送文季高倅興元

素衣京洛帳成緇，青鬢江吳喜未絲。
燭暗不眠談舊事，

酒闌作惡問行期
琴書情話須親戚
風雨殘春更別離
屈指歸來重一笑
掃除門巷著旌麾

書懷二絕再送文季高兼呈新帥閻才元侍郎

劔關雲棧守非難
函谷泥封久未刊
今日漢中誰國士
莫教春草上齋壇

西出陽關有舊知
薰風淥水泛蓮時
煩君傳語詩書帥
更寄臺城別後詞

寄題石湖海棠二首

手開芳徑越城頭紅錦屠蘇結綺樓不把萬枝銀燭照
淡雲微月替人愁

老懶居家似出家園林春色雨沾沙海棠尚自無心看
天女何須更散花

家人子輩往石湖檢校暮歸

南浦回春棹東城掩暮扉兒修雞柵了女挈菜籃歸風
力雖欺酒花香尚染衣衰翁牢守舍腸斷釣魚磯

枕上聞蒲餅焦

曉寒燕雀噤春陰
珍重清簧度好音
窻色熹微歌枕聽
夢成舟樣竹溪深

石湖芍藥盛開向北使歸過維揚時買根栽此因
追記舊事二首

竹西歌吹荻花秋
遺老垂淚送遠遊
羌笛夜闌吹出塞
當年如此夢揚州

萬里歸程許過家
移將二十四橋花
石湖從此添春色
莫把蒲萄首宿誇

次韻龔養正中秋無月三首

詞客幕天清露下老翁卧病破窓中高吟大醉輸公等
不見嫦娥與我同

去年怪雨無端甚今歲癡雲亦復然減却新詩酸却酒
乘除添得一更眠

丙夜清光些子見兒童驚喜強雄夸闌珊高興應無幾
恰似春殘看落花

殊不惡齋秋晚閒吟五絕

好風入簾圖畫響斜照穿隙網絲明檐間雙雀有時關
壁下一蛩終日鳴

旁若無人鼠飲硯塵之不去蠅登盤天涼睡起枕痕煖
日晚慵來香字寒

就食遷居蟻墻壤隨風作舍蛛裊絲百年何處用三窟
萬事信緣安一枝

市聲洶洶鼓催陣日影駸駸潮漲痕消磨意氣默數息
把玩光陰牢閉門

中秋昨已等閒過重九今還如夢來霜鬢數莖羞墮情
黃花三度笑空杯

老陳道人自云夢被召作地上主者又常受一貴
官家供祝之曰他日必來吾家作兒戲贈小頌

野人何苦赴官差符使追呼撓道懷幸有千門香積供
不如隨喜去羅齋

題張戡蕃馬射獵圖

陰山磧中射生虎馬逐箭飛如脫兔割鮮大嚼飽何求

風滿平原聲震怒太乙靈旗方北指
制轡還歸莫南顧
三驅直欲到窮沙
歸來待奏長楊賦

題趙昌四季花圖

海棠梨花

醉紅睡未熟淚玉春帶雨
阿環不可招空寄凭肩語

葵花萱草

衛足保明哲忘憂助歡娛
欣欣夏日永媚我幽人廬

拒霜旱蓮

霜天木芙蓉陸地旱蓮草水花雲錦盡不見秋風好

梅花山茶

月淡玉逾瘦雪深紅欲燃同時不同調聊用慰衰年

乙巳十月朔開爐三首

石湖今日開爐紙窓銀白新糊童子燒紅楮拙老翁睡
煖糴輸

石湖今日開爐兩壁仍安畫圖萬事篆煙曲几百年
衲園蒲

石湖今日開爐俗家恰似精廬
投涕雖無情緒吟詩却有工夫

有歎二首

春秋蘭菊殊調南北馬牛異方
心醉井蛙海若眼空鵬海鳩枋

貧富交情乃見炎涼歲序方成
越秦本異肥瘠魯衛何曾弟兄

留簡伯俊

我昔賦遠遊萬里無親朋惟君同懷抱相從共茵憑踰
嶺穿瘴茅捫參倚枯藤隨行一瓶鉢淡如雲水僧火馳
炎熱場見此玉壺冰東歸常愧君無力相引繩長材屈
小邑果以循吏稱豈不有薦墨翩然支郡丞五溪在何
許水駛山峻增漫仕不擇地搏扶笑鯤鵬獨有故意長
問疾訪姜肱疊疊談昨夢一一記吾曾中年畏離別況
我雪鬢鬢此意君自解少留對青燈

枕上有感

窻明似月曉光新被煖如薰
睡息勻衝雨販夫牆外過
故應嗤我是何人

夜坐有感

靜夜家家問戶眠滿城風雨驟
寒天號呼賣卜誰家子
想欠明朝糴米錢

十月二十六日三偈

聲聞與色塵普以妙香薰
昔汝來迷我今吾却戲君
有箇安心法無時不可行
只將今日事隨分了今生

窓外塵塵事窓中夢夢身既知身是夢一任事如塵

石湖詩集卷二十五

石湖詩集卷二十六

宋 范成大 撰

吳歎一首送丘宗卿自平江移會稽

吳兒與君緣不薄再騎竹馬迎南郭吳兒與君緣復淺
坐席纔溫旗脚轉東人賦重越吟悲趣了茲段隨朝雞
胸竒百鍊當活國君豈獨私吳與越鶴鳴樟橋猿夜啼
匈奴未滅家何為功成他年歸結屋好在山花休斬竹

宗卿十三年前嘗守吳今復來我年而去越民困於和
買蓋有意為蠲減之樟橋宗卿卜築處有山牡丹二本
歲各發百花手植篁竹二十年今一尺
圓作舍時悉當伐去時實錄席上語也

贈壽老

農圃規模昔共論雲奎卜築又逢君
君眉菴壽老長隨喜

好箇拋梁伏願文

十八年前始作農圃堂壽老自眉菴
遠來相與度地今雲奎始基又值其

入城留觀上
梁似非偶然

再贈壽老

澹齋寂寞澹菴空
玉柱金庭一夢中
我病君衰猶見在

莫嫌俱作白頭翁

頃與澹齋兄遊洞庭林屋并澹菴現
老眉卷壽老偕今十年矣壽老見過

話舊事二澹
已為古人

雪中聞牆外鬻魚菜者求售之聲甚苦有感三絕
飯籬驅出敢偷閒
雪脛冰鬚慣忍寒
豈是不能扃戶坐
忍寒猶可忍饑難

憂渴焦山業海深
貪渠刀蜜坐成禽
一身冒雪渾家煖
汝不能詩替汝吟

啼號升斗抵千金
凍雀飢鴉共一音
勞汝以生令至此

悠悠大塊亦何心

詠河市歌者

豈是從容唱渭城
箇中當有不平鳴
可憐日晏忍飢面
強作春深求友聲

偶箴

情知萬法本來空
猶復將心奉八風
逆順境來欣戚變
咄哉誰是主人翁

丙午新正書懷十首

不用桃符貼畫雞身心安處是天倪行年六十舊歷日
汗脚尺三新杖慕祝我賸周花甲子謝人深勸玉東西
春風若借筋骸便先渡南村學灌畦

新園在河南名范村

瘦骨難勝遇節衣日高催起起晨炊病憐柳栗隨身慣
老覺屠蘇到手遲一飽但蘄庚癸諾百年甘守甲辰雌
莫言此外都無事柳眼梅梢正索詩

煮茗燒香了歲時靜中光景笑中嬉身閒一日似兩日
春淺南枝如北枝朝鏡略無功業到午窻惟有睡魔知

年來并束牀頭易一任平章濟叔癡

窮巷閒門本閭然強將爆竹聒堦前人情舊雨非今雨

老境增年是減年口不兩匙休足穀身能幾履莫言錢

埽除一室空諸有龐老家人總解禪

吳訪云一口不能著兩匙

厲風翻海雪漫天百計逃寒息萬緣穩作被爐如卧炕

厚裁綿旋入勝披氈尊前現在瞢騰醉飯後無何爛熳

眠斟酌出門高興盡從教閒却刺溪船

被爐綿旋皆新得法老人御冬

之具二物尤為要切

俗情如絮已泥沾因病偷閒意屬厭鵬鴉相安無可笑
熊魚自古不容兼灰葺楮多時煖雪壓蔓菁滿意甜
溫飽閉門吾事辦異時書判指如籤

炭熟香濃石鼎煨人言小閣是春臺蕉心翠展一冬在
梅蕊粉融連夜開肅肅九冰妨發育溫溫三火護恢台
養生此外無遺說梨棗元須趁煖栽

水芭蕉長三寸在煖閣中經冬不瘁

瓶梅亦烘然先拆

經過埽軌但幽棲巢穩林深寄一枝栗里歸來窻下卧

香山老去病中詩東風馬耳塵勞後半夜雞聲睡熟時
俯仰平生盡塵迹恰如膈膊幾枰碁

憲明憲暗篆煙翻珍重晨光與夕暉東院齋鐘披被坐
南城箴鼓岸巾歸幾人霜滑騎朝馬何處燈殘織曉機
懶裏若承三昧力始知忙裏事俱非

此篇叙蚤眠
晏起之事

殊方節物記吾曾海北天西一瘦藤烏欖雞檳嘗老酒
酥花芋葉試新燈瘴雲度嶺濃如墨邊雪窺窓冷欲冰
閒展兩鄉圖畫看卧遊何必減深登

此篇記桂林成都
元日舊事檳欖皆

椒盤中物老酒十數年不壞者滴酥為花熬芋
為柳葉三夕張燈如上元上下句分記廣蜀

雲露

并序

予素不能飲病又止酒比得佳釀法客以雲露名之
取吉雲五露飲之則老者少病者除之意也乃復濡
脣且為賦詩

飲少嘗遭大戶嗤病中全是獨醒時三年魯望自憐賦
萬祀淵明真止詩破戒忽傳雲露法賞心仍把雪梅枝
一杯未問長生事先胃蛛塵藥裏絲

陸魯望好飲病甫
里三年作自憐賦

金史四庫全書
卷二十六
賓至潔壺
置觴而已

丙午新年六十一歲俗謂之元命作詩自賦

歲復當生次星臨本命辰四人同丙午初度再庚寅長
狄名猶記沙隨會若新童心仍竹馬暮境忽蒲輪鏡裏
全成老尊前略似春三年歸汶上千日卧漳濱剛長交
新泰陰消脫舊屯網蛛縈藥裏竇犬吠醫人窓下烏皮
几田間紫領巾鯢淵方止水鯤海任揚塵波匿觀河見
維摩示病身顰端還一笑默志幻中真人文潞公詩云四
人二百四十歲

況是同生丙午年僕與今丞相王公樞使周公參政錢公皆丙午又頃皆同朝故用此事稍的也

丙午人日立春屈指癸卯孟夏晦得疾恰十日矣

因戲書一絕

百年能有幾春光只合都將付醉鄉
衰病豁除千日外尚餘三萬五千場

春困二絕

吳俗立春日兒童以春困相呼以掉頭不應者為點

綠花生菜又新年節物人情已可憐
不待春來呼我困四時何日不堪眠

諾惺菴裏呼春困特地回頭著耳聽若解昏昏安穩睡
主翁方始是惺惺

立春大雪招親友共春盤坐上作

積雪錮萬瓦雲容如死灰豈惟梅柳寒小槽冰去聲春醅

東風乃多事仍將六花來兒女曉翻餅呵手把一杯菘

甲剪翠羽非黃粿金釵齒牙幸牢潔對案心眼開華年
惜節物況此霜鬢催如何十日病三見寅杓回旁人不
堪憂我心猶始孩衰翁豈知道癡絕忘形骸化兒任惡

劇歡伯有奇懷餘寒會退聽一笑當安排

箴子文以春雪數作用為瑞不宜多為韻賦詩見

寄次韻

同雲凝不埽梅柳春到遲笙歌煖寒會當任主人為圍
尺庸何傷表丈乃非瑞郢中姑度曲山左已驅鷹世無
辟寒香誰能不龜手鄰舍索米歸衾稠無恙不貧人寒
切骨無地兼無錐安知雙綵勝但寫入春宜販夫博口
食奈此不售何無術慰啼號汝今一身多

詠吳中二燈

琉璃毬

龍綜縹冰繭魚文鏤玉英
雨絲風外縐雲網日邊明
疊暈重重見分光
面面呈不深間裏趣爭識箇中情

萬眼羅

弱骨千絲結輕毬
萬錦裝綵雲籠月魄
寶氣繞星芒
檀點紅嬌小梅粧
粉細香等閒
三夕看消費一年忙

元夕後連陰

問訊東風幾日來，冷煙寒霧鎖池臺。
埽空積雪翻成雨，收盡殘燈未見梅。
夜飲厭厭非老伴，春陰漠漠是愁媒。
誰能腰鼓催花信，快打涼州百面雷。

次韻嚴子文見寄

雨雲濃壓屋山頭，詩句端來寫客憂。
雷電已將金薤取，瓊瑤難報木瓜投。
無心我正銘三住，有意君堪話四休。
何日尋春同步屨，先教啼鳥說來由。

再次韻述懷約子文見過

灰木心形雪滿頭鶴鳧長短不悲憂
甕畦純白無機械
蒲局裊盧任博投若愛陶陶并兀兀
先須莫莫與休休
箇中情話誰能共
雞黍明當挽仲由

寄題郟縣蓮仙觀四楠

蓮仙手植嘗有
丹光現其杪

沉犀浦上舊仙蹤
老木長春翠掃空
敢請丹光來萬里
為扶雲嶠駕飛鴻

春來風雨無一日
好晴因賦瓶花二絕

滿插瓶花罷出遊
莫將攀折為花愁
不知燭照香薰看

何似風吹雨打休

酒冷花寒無好懷
柴荆終日為誰開
三分春色三分雨
雅似東風本不來

寄題永新張教授無盡巖

古來誰道四并難
對境心空著處安
要識見聞無盡巖
先除夢幻有為觀
削平丘垤孤峰峻
撤去藩籬萬象寬
快誦老坡秋望賦
大千風月一毫端

寄題莫氏椿桂堂

莫氏五子皆登
科居崇德縣

君不見衣冠盛事今猶昔前說燕山後崇德聯翩五組
帶天香世上贏金賤如礫他年詩禮到雲來日日高堂
稱壽杯桂長孫枝椿不老却比寶家應更好

春晚即事留游子明王仲顯

繡地紅千點平橋綠一篙棟花來石首穀雨熟櫻桃笑
我生塵甑慚君有意袍故人能少駐門徑久蓬蒿

留游子明

得得楚音喜息息笑口開牢愁攻易破歸夢挽難迴我

已踈茶椀君今減酒杯不知乘興棹更得幾回來

初夏三絕呈游子明王仲顯

東君不解惜芳菲料峭寒中一夢非
剪盡牡丹梅子綻何須風雨送春歸

一簾芳樹綠蔥蔥胡蝶飛來覓綺叢
雪白茶蘼紅寶相尚攜春色見薰風

送春迎夏未聞雷日日斜風細雨來
不是故人能裹飯柴門雖設為誰開

送王仲顯赴瓊莞

三徑蓬蒿春雨肥
微君誰與開柴扉
電光射牛書過目
虹氣干斗酒淋衣
十年五別歲月老
一方萬里音塵稀
誰云滄海斷地脉
莫信天南無鴈飛

梅雨五絕

梅雨暫收斜照明
去年無此一日晴
忽思城東黃篋舫
卧聽打鼓踏車聲

乙酉甲申雷雨驚
乘除却賀芒種晴
插秧先插蚕私稻

少忍數旬蒸米成

吳農志五月甲申乙酉兩雨則大水誘云甲申猶自可乙酉怕殺我

風聲不多雨聲多洶洶曉衾聞浪波恰似秋眠隱靜寺

玉霄泉從牀下過

繁昌隱靜寺方丈山後玉霄泉自板閣下過最為佳致

千山雲深甲子雨十日地濕東南風靜裏壺天人不到

火輪飛出默存中

道家東向坐想日出以煉氣

雨霽雲開池面光三年魚苗如許長小荷拳拳可包鮓

晚日照盤風露香

芒種後積雨驟冷三絕

一菴濕蟄似龜藏深夏暄寒未可常昨日蒙絺今挾纊
莫嗔門外有炎涼

梅黃時節怯衣單五月江吳麥秀寒香篆吐雲生煖熟
從教窻外雨漫漫

梅霖傾瀉九河翻百漕交流海面寬良苦吳農田下濕
年年披絮插秧寒

崑山農人梅雨時著氈絮以耘秧歲以為常

東宮壽詩

再造災圍撫太寧龍樓毓德會千齡三宮疊矩深邦本

兩曜重光炳帝庭自古東明陪出日祇今南極是前星
鈞天歲歲家人禮長對堯階第四筵

並世勲華照古今朱明綵服侍尊臨邦家大慶重親養
社稷元良萬國心菊露壺觴秋色正桂風殿閣月香深
欲知天序無疆處銅律聲中治世音

寄題漢中新作南樓二首

我作籌邊倚半霄西山雲雪照弓刀如今且說南樓勝
應共漢壇相對高

甲子周天事好還關河響動劍光寒秦川草木多如薺
時倚樓闌直北看

次韻李子永見訪二首

混俗休超俗居家似出家有為皆影事無念即生涯莫
覓安心法翻成捏目花作糜須穀粟千劫漫炊砂
有意能停棹多情易憶家清詩穿月脇遠夢繞天涯雨
蝶衣濡粉秋蚊喙吐花新涼宜小駐談笑有丹砂

自詠瘦悴

皮下多無肉秋來瘦不禁骨稜春焙鈐筋感海山沉蟻
蟲從何有蚊蠅枉見侵惟餘老筇杖相伴兩虛心

石湖詩集卷二十六

石湖詩集卷二十七

宋 范成大 撰

四時田園雜興六十首

并引

淳熙丙午沉疴少紓復至石湖舊隱野外即事輒書
一絕終歲得六十篇號四時田園雜興

柳花深巷午雞聲桑葉尖新綠未成坐睡覺來無一事
滿窓晴日看蠶生

土膏欲動雨頻催，萬草千花一餉開。
舍後荒畦猶綠秀，鄰家鞭筍過牆來。

高田二麥接山青，傍水低田綠未耕。
桃杏滿村春似錦，踏歌椎鼓過清明。

老盆初熟杜茅柴，攜向田頭祭社來。
巫媪莫嫌滋味薄，旗亭官酒更多灰。

社下燒錢鼓似雷，日斜扶得醉翁回。
青枝滿地花狼藉，知是兒孫鬪草來。

騎吹東來里巷喧
行春車馬鬧如煙
繫牛莫礙門前路
移繫門西碌碡邊

寒食花枝插滿頭
舊裙青袂幾扁舟
一年一度遊山寺
不上靈巖即虎丘

郭裏人家拜掃回
新開醪酒薦青梅
日長路好城門近
借我茅亭煖一杯

步屨尋春有好懷
雨餘蹄道水如杯
隨人黃犬攬前去
走到溪邊忽自迴

種園得果屢償勞不奈兒童鳥雀搔已插棘針樊筍徑
更鋪漁網蓋櫻桃

吉日初開種稻包南山雷動雨連宵今年不欠秧田水
新漲看看拍小橋

桑下春蔬綠滿畦松心青嫩芥臺肥溪頭洗擇店頭賣
日暮裏鹽沽酒歸

右春日田園雜興十二絕

紫青萹菜卷荷香玉雪芹芽拔薤長自擷溪毛充晚供

短篷風雨宿橫塘

湖蓮舊蕩藕新翻
小小荷錢沒漲痕
斟酌梅天風浪緊
更從外水種蘆根

胡蝶雙雙入菜花
日長無客到田家
雞飛過籬犬吠竇
知有行商來買茶

湔裙水滿綠蘋洲
上巳微寒懶出遊
薄暮蛙聲連曉鬧

今年田稻十分秋

吳下以上已蛙
鳴則知無水災

新綠園林曉氣涼
晨炊蚤出看移秧
百花飄盡桑麻小

夾路風來阿魏香

三旬蠶忌閉門中鄰曲都無步往蹤猶是曉晴風露下
采桑時節暫相逢

汙萊一稜水周圍歲歲蝸廬沒半扉不著芟菁難護岸
小舟撐取葑田歸

茅針香軟漸包茸蓬櫨甘酸半染紅采采歸來兒女笑
杖頭高挂小筠籠

穀雨如絲復似塵煮瓶浮蠟正嘗新牡丹破萼櫻桃熟

未許飛花減却春

雨後山家起較遲
天窓曉色半熹微
老翁欹枕聽鶯啞
童子開門放燕飛

海雨江風浪作堆
時新魚菜逐春回
荻芽抽筍河魴上
棟子開花石首來

烏鳥投林過客稀
前山煙暝到柴扉
小童一棹舟如葉
獨自編闌鴨陣歸

右晚春田園雜興十二絕

梅子金黃杏子肥
麥花雪白菜花稀
日長籬落無人過
惟有蜻蜓蛺蝶飛

五月吳江麥秀寒
移秧披絮尚衣單
稻根科斗行如塊
田水今年一尺寬

二麥俱秋斗百錢
田家喚作小豐年
餅爐飯甑無飢色
接到西風熟稻天

百沸縹湯雪湧波
縹車嘈噴雨鳴衰
桑姑盆手交相賀
綿繭無多絲繭多

小婦連宵上絹機大者催稅急於飛今年幸甚蠶桑熟
留得黃絲織夏衣

下田肩水出江流高壠翻江逆上溝地勢不齊人力盡
丁男長在踏車頭

畫出耘田夜績麻村莊兒女各當家童孫未解供耕織
也傍桑陰學種瓜

槐葉初勻日氣涼蔥蔥鼠耳翠成雙三公只得三株者
閒客清陰滿北窓

黃塵行客汗如漿
少住儂家漱井香
借與門前磐石坐
柳陰亭午正風涼

千頃芙蓉放棹嬉
花深迷路晚忘歸
家人暗識船行處
時有驚忙小鴨飛

采菱辛苦廢犁鉏
血指流丹鬼質枯
無力買田聊種水
近來湖面亦收租

蝸蟾千萬沸斜陽
蛙黽無邊聒夜長
不把癡聾相對治
夢魂爭得到藜牀

右夏日田園雜興十二絕

杞菊垂珠滴露紅
兩蛩相應語莎叢
蟲絲罨盡黃葵葉
寂歷高花側晚風

朱門巧夕沸歡聲
田舍黃昏靜掩扃
男解牽牛女能織
不須徵福渡河星

橘蠹如蠶入化機
枝間垂繭似蓑衣
忽然蛻作穿花蝶
翅粉纔乾便學飛

靜看簷蛛結網低
無端妨礙小蟲飛
蜻蜓倒挂蜂兒窘

催喚山童為解圍

垂成穡事苦艱難
忌雨嫌風更怯寒
殘訴天公休掠剩
半償私債半輸官

秋來只怕雨垂垂
甲子無雲萬事宜
穫稻畢工隨曬穀
直須晴到入倉時

中秋全景屬潛夫
棹入空明看太湖
身外水天銀一色
城中有此月明無

新築場泥鏡面平
家家打稻趁霜晴
笑歌聲裏輕雷動

一夜連枷響到明

租船滿載候開倉粒粒如珠白似霜不惜兩鍾輸一斛
尚贏糠覈飽兒郎

菽粟瓶罌貯滿家天教將醉作生涯不知新滴堪芻未
今歲重陽有菊花

細擣棖虀買鱸魚西風吹上四腮鱸雪鬆酥膩千絲縷
除却松江到處無

新霜徹曉報秋深染盡青林作纈林惟有橘園風景異

金史四十五卷
卷二十七
碧叢叢裏萬黃金

右秋日田園雜興十二絕

斜日低山片月高
睡餘行藥繞江郊
霜風掃盡千林葉
閒倚筇枝數鶴巢

炙背檐前日似烘
煖醺醺後困蒙蒙
過門走馬何官職
側帽籠鞭戰北風

屋上添高一把茅
密泥房壁似僧寮
從教屋外陰風吼
卧聽籬頭響玉簫

松節然膏當燭籠凝煙如墨暗房櫳晚來拭淨南窓紙
便覺斜陽一倍紅

乾高寅缺築牛宮卮酒豚蹄酹土公牯犢無瘟犢兒長
明年添種越城東

放船閒看雪山晴風定竒寒晚更凝坐聽一篙珠玉碎
不知湖面已成冰

撥雪挑來踏地菘味如蜜藕更肥醲朱門肉食無風味
只作尋常菜把供

榻拙無煙雪夜長地爐煨酒煖如湯莫嗔老婦無盤飣
笑指灰中芋栗香

煮酒春前臘後蒸一年長饗甕頭清塵居何似山居樂
秫米新來禁入城

黃紙蠲租白紙催皂衣旁午下鄉來長官頭腦冬烘甚
乞汝青錢買酒迴

探梅公子歎柴門枝北枝南總未春忽見小桃紅似錦
却疑儂是武陵人

村巷冬年見俗情鄰翁講禮拜柴荆長衫布縷如霜雪
云是家機自織成

右冬日田園雜興十二絕

自晨至午起居飲食皆以牆外人物之聲為節戲
書四絕

巷南敲板報殘更街北彈絲行誦經已被兩人驚夢斷
誰家風鶴鬪鳴鈴

菜市喧時窓透明餅師叫後藥煎成閒居日出都無事

惟有關門掃地聲

北岩教回搥鼓遠東禪飯熟打鐘頻小童三喚先生起
日滿東窓煖似春

起傍東窓手把書華顛種種不禁梳朝餐欲到須中裏
已有重來晚市魚

舫齋信筆

燕居故可樂病卧翻可憐身閒僮更健其人半神仙既
無揚州鶴龍鍾任吾年南齋深而明畧似西江船船中

何所有藥氣雜爐煙親朋稀老伴暫來即飄然秋蠅獨
戀戀終朝相撲緣霜晴日色濃寔紙烘春妍但愁添眼
花瞑坐聊參禪困從定中生普騰夢相牽三昧未得力
十魔方現前欠伸付一笑朽腐難凋鑄東藍午齋動風
順鐘鼓傳家人亦相呼趣具先生餐牛脔能幾何蟬腹
易便便此日雖可惜姑付食與眠

病中不復問節序四遇重陽既不能登高又不觴

客聊書老懷

四時變遷翻覆手百卉於人亦何有騷客顛詩亦狂酒
強惜黃花愛重九少年習氣似陶公采采金英滿衣袖
攜壺木末最關情歌帽風前幾搔首饒吻偏憐粽粟香
新衣不管囊萸具貪將節物趁遨頭肯向賓筵稱病叟
如今衰颯悟空華現在去來飛電走登臨舊迹如夢斷
觴詠故人多骨朽百年長短隨隙駒萬化陳新直芻狗
不堪把玩堪一笑安用歲時歌拊缶家人亦復探新筍
插花洗醖為翁壽蒲團困坐眼慵開莫把故情看老醜

挽鬚兒女太癡生更問今年有詩否

閭門初泛二十四韻

淳熙丙午重九後十日家人輩以余久病適新修小舫勸

扶頭一出以襍被走滯遂至北城檢校桃花塢出關傍漕河望楓橋橫塘中路而還故有即事

詠景唐律之作

好在馳煙路平生載酒行
摧藏身久病契闊歲頻更
昨夜燈花繞今朝稻把晴
出門新夢境觸目舊詩情
水遠推蓬眩天寬倚枕驚
轉灣添緯挽罨岸併篙撐
舫後衰兒女艫前酌弟兄
醅香新麴嫩茗味小春輕
紅皺分霜

果黃薦撚夕英纈林疎露屋朱閣靜臨城桃塢論今昔
楓橋管送迎山腰樵擔動木末酒旗明竟日密煙直中
流塔影橫數帆殘照滿一笛暮江平曬網楓邊桁牽管
柳際棚岫雲縈石住田水穴堤鳴過渡牛歸速穿籬犬
吠獐魚寒猶作陣鴈遠更聞聲急榜潮痕出疎鐘暝色
生鄰翁欣問訊逋客愧寒盟一昨成歸卧于今負耦耕
生涯都塌颯心曲漫崢嶸猿鶴休多怨菰蓴尚可羹
囊裏吾厭苦扶僊且班荆

小春海棠來禽

東君好事惜年華
偏愛荒園野老家
一任西風管搖落
小春自放數枝花

丙午東宮壽詩

國系丁年盛天開甲觀祥
黃離增煥炳赤伏衍明昌
一日三天見元辰萬國康
姿神輝玉裕德業燦金相
書聖規宸藻文心儷漢章
乾坤參火大日月並升常
祖武瞻興慶親庭拱未央
晨昏兩慈壺詩禮一賢王
道統家傳

正炎圖國本強桑弧仍穀旦銅律又清商舊事蘭猗殿
新涼桂子香黃華先浥露青女緩行霜史賀星同軌農
歌稼滌場與齡占夢帝多枯叶思皇磐石重山固靈源
少海長三宮同壽域歲歲頌無疆

重陽後菊花二首

寂莫東籬濕露華依前金鑿照泥沙世情兒女無高韻
只看重陽一日花

過了登高菊尚新酒徒詩客斷知聞恰如退士懸車後

勢利交親不到門

驟寒吟

九月竒寒前未聞
巷南巷北無行人
冥凌盡用大冬手
肯為歲華留小春
陰風吹雨作冰屑
馳裘如鐵綿裘折
可憐籬下木芙蓉
不獨宜霜更宜雪

重陽後半月
天氣溫麗忽變竒
寒晦日大雪鄉人
御冬之計多未辦

狂飈吹小春
刮面劇劒鋌
雲氣淤濃墨
午窓變曛黃
六

花大如掌浩蕩來無鄉青女正熟睡不記行新霜寒暑
故密移滕巽乃爾狂南鄰炭未買北鄰綿未裘敢論酒
價湧東薪逾桂芳豈不解蚤計善舞須袖長頻年田薄
收十家九空囊被凍知不免但恨太息忙今朝復何朝
晴色挂屋梁人物各解嚴兒童笑相將熙如谷黍溫免
作溝木僵兩鄰報無恙為汝歌慨慷

戲詠絮帽

簡伯俊傳此樣
睡中甚禦寒氣

尖斜緇撮似兜鍪緊護風寒煖白頭不解兵前當前鏖

解令曉枕睡鞦韆

雪中送炭與龔養正

立春前五日

誰與幽人煖直身
筠籠衝雪送烏薪
煩君笑領婆歡喜
探借新年五日春

代門生作立春書門貼子詩四首

煖日黃金柳光風白玉梅
門闌開壽域人物滿春臺
有喜何須藥無塵即是仙
壺中春日月聊數八千年
草木霑雲露峰巒近壁奎
新春行樂處南北共花溪

日月添書帙湖山引杖藜
勝周花甲子多醉玉東西

石湖詩集卷二十七

謹案卷二十五第七頁後三行主翁今但諾惺惺
刊本惺惺訛醒醒今改

第十頁前三行不見嫦娥與我同刊本嫦訛常據
宋詩改

卷二十六第四頁後八行卧遊何必減深登按深
登二字疑訛宋詩鈔作深燈又複前韻姑仍本
集之舊

第五頁後八行四人二百四十歲况是同生丙午

年刊本訛作三百七十歲按四人同生不當有
此年數且宋史載文彥博年九十二歲數亦不
合今據宋詩改正

卷二十七第三頁後四行不著芟菁難護岸刊本
著訛看菁訛青據黃昌衢本改

第四頁後三行五月吳江麥秀寒刊本吳江訛江
吳今改

第六頁前六行忽然蛻作穿花蝶刊本穿訛多據

黃昌衢本改


第十二頁前六行昨夜燈花繞刊本繞訛曉據黃

昌衢本改

第十二頁前三行小春自放數枝花刊本放訛管

據黃昌衢本改





總校官庶吉士臣侍朝

校對官庶吉士臣章宗瀛

校對官編修臣楊壽楠

謄錄監生臣江潮

謄錄監生臣王恭雲